

Ես խոստացայ խուլ լինել, մուկ լինել, խոստացայ կոյր գործիք լինել...: Ես խոստացայ անսիրտ, առանց կամքի մեքենայ լինել...

Ես կատարեցի իմ խոստմունքը:

Պարսկաստանում այն ժամանակ դեռևս նոր էր կազմուել մի գաղտնի հիմնարկություն, որ կոչւում էր «Ֆարամուշխանա», այսինքն մոռացութեան տուն: Այս տան մէջ ընդունուելու գլխաւոր պայմանը այն էր, որ իւրաքանչիւր անդամ այնտեղից դուրս գալուց յետոյ պետք է մոռացութեան տար բոլորը, ինչ որ տեսել, ինչ որ լսել էր այնտեղ: Այսինքն՝ պետք է պահպաներ սաստիկ ծածկամտութիւն: Թէ ի՞նչ նպատակ ունէր այդ գաղտնի հիմնարկութիւնը, — ես չգիտեմ, որպէս չգիտէին նրա իւրաքանչիւր անդամները, թէ ինչ է գործում իրանից բարձր աստիճանի վրայ գտնուող անդամը: Կրտսեր անդամը աւագի հլու գործօն էր, պետք է անպայման կերպով հնազանդուէր նրան, պետք է կատարէր ամէն բան, ինչ որ կը հրամայէր նա, առանց գիտենալու, թէ ինչ նպատակով էր գործում: Հիմնարկութեան բուն խորհուրդը պահուում էր նրա գլխաւորների մօտ: Միւսները անգիտակցական մեքենաներ էին միայն: Անդամների իւրաքանչիւրը առանձին նշաններից կարող էր ճանաչել միւսին, առանց գիտենալու նրա անունը, նրա ո՛վ կամ ինչտեղացի լինելը: Միայն որոշ խմբեր իրանց մէջ գաղտնիք չուներին, իսկ ամէն մի խումբ առանձին վեր առած, միմեանց գործունեութիւնից տեղեկութիւն չուներին:

Կարծես, մի այսպիսի հասարակութեան մէջ էի ընկել ես: Ինձանից էլ խոստում առին, որ ամէն բան, ինչ որ կը տեսնեմ, ինչ որ կը լսեմ, մոռացութեան տամ: Ես կատարեցի իմ խոստմունքը: Իսկ այս տողերը, որ գրում եմ այժմ, — գրում եմ ուղիղ յիսուն տարուց յետոյ, երբ այն անձինքը այլեւս աշխարհի երեսին չեն մնացած, երբ նրանց գործունեութիւնը յայտնուեցաւ եւ անհետացաւ մի կարճատեւ փոթորիկի նման...

Ժ. ԶԻ

Դեռ երեխայութիւնից ես ձի նստելու սաստիկ սէր ունէի. այն ժամանակ այս ցանկութիւնը լցուցանում էի, հեծնելով փայտեայ երկայն ձողի վրայ, եւ ամբողջ ժամերով վազեցնում էի մեր բակում: Յետոյ, երբ փոքր-ինչ մեծացայ, իմ փայտեայ նժոյգին փոխարինեցին կենդանի արարածներ: Մեր հորթերը հանգստութիւն չուներին ինձանից, եւ մինչեւ անգամ ահագին գայլաման Մըրոն — մեր շունը — երբեմն ստիպուած էր ծառայել իմ զորաճութիւններին: Ես բռնում էի նրա երկայն ականջներից, թռչում էի մէջքի վրայ, եւ խեղճ